

МЕСЯЦА АПРЕЛЯ В 27-Й ДЕНЬ

СВЯТАГО СВЯЩЕННОМУЧЕНИКА СИМЕОНА, СРОДНИКА ГОСПОДНЯ

На Господи, воззвах: стихиры праздника 3, и апостола 3, глас 4.

Подобен: Яко добля:

Священник священнейший, * страдалец законен, * сродник Зиждителя истинный, * чудотворец досточуден, * светильник пресветел, * заблуждших вождь, Симеоне, показался еси, * столп непоколеблен честныя Церкви, * и Вышняго наследник Царствия, * и Ангелом равночестный.

По болезнех телесных, * святителю преславне, * по всяцей муце многоболезненной, * по премногих борениях * Кресту приблизился еси, * подобяся Христу, распеншемуся волею. * Темже, радуящися, святую твою память совершающе, Симеоне, * молитвами твоими * разрешение согрешений приемлем.

В Церковь Небесную * священо вшел еси, * священо обливаемь, блаженне, кровию, * и Троице предстоиши, * богато сияя отгуду * блистании истекающими, пребогате. * Темже днесь, Симеоне, * твою память светоносную совершающе, * чувства души просвещаем.

Слава, и ныне, праздника, или Богородичен:

Тучами Духа Пресвятаго, * мою мысль ороси, * Яже каплю рождаша, Христа, * неизчетно безмерная беззакония человеков * щедротами измывшую; * изсуши источник страстей моих * и потока мя сподоби * пищи живыя присно * молитвами Твоими.

Крестобогородичен:

На Кресте Тя яко узре * пригвождена, Господи, * Агница и Мати Твоя дивляшися, * и, что видение сие, – взываше, – * Сыне вожделенне? * Сия Ти неверный собор воздаде беззаконный, * иже многих Твоих чудес насладивыйся. * Но слава неизглаголанному сошествию Твоему, Владыко.

Тропарь, глас 1:

Христова тя сродника, Симеоне священноначальниче, * и мученика тверда священо восхваляем, * прелесть потребившаго * и веру соблюдшаго. * Темже, днесь всевятую твою память празднующе, * грехов разрешение молитвами твоими приемлем.

Ин тропарь, глас 4:

В мире радуешися, Симеоне Иерусалимский, * любезно Христу Богу, * тело душевное чисто сохранив, * претерпевый страсть телесную, долготерпеливе, крепко, * и в конец на кресте распят бысть. * Ты бо, Истинному Рачителю подобяся, * и от мира скоро отлучися, * лютыя язвы на себе понесе * и молишися о душах наших.

НА УТРЕНИ

Канон праздника со ирмосом на 6 и святого на 6. Творение Иосифово. Глас 4.

Песнь 1

Ирмос: Воспою Тебе, Господи Боже мой, * яко извел еси люди из работы египетския, * покрыл же еси колесницы фараоновы и силу.

Симеоне священне, Владыце, венценосец, предстоя, любовию память твою творящим всесвященную согрешений разрешение проси.

Ветрилом окриляемь, святителю, крестным, яко воистинну хладом духа, бури мимо текл еси прелести, всеславне.

Миром Божественным помаза священника тя людем Иже от колена Иудова прозябый Христос, Симеоне священне и Ангелом собеседниче.

Богородичен: Яко сущи тварей вышши, всех Творца и Бога во чреве зачала еси, Дево, и родила еси человеком на избавление.

Песнь 3

Ирмос: Лук сильных изнеможе, * и немощствующии препоясаша силою. * Сего ради утвердися в Господе сердце мое.

Мановением к Богу обожаемь, весь, Симеоне, световиден был еси, мучения облистая сиянием, священне.

Утро сущим во тьме возсиял еси, Правды показуя Солнце, из облака, Девы Отроковицы, человеком возсиявшее.

Мирския сласти возненавидел еси, святителей красота лепотна был еси и страданием Небесныя славы, отче, сподобился еси.

Богородичен: Весь похвалений побеждается закон о Тебе, Богородительнице Всенепорочная: Бог бо из Тебе, якоже весть, нас ради Человек бысть.

Седален, глас 4.

Подобен: Явился еси днесь:

Яко звезду велику, * Церковь, стяжавши днесь Богогласнаго Симеона, просвещается, зовущи: * радуйся, мучеников честный начальниче.

Слава, и ныне, праздника, или Богородичен:

Пречистей руце Твои, Дево Мати, простерши, * покрый уповаюция на Тя и Сыну Твоему зовущия: * всем подаждь, Христе, милости Твоя.

Крестобогородичен:

На Древе видящи воздвижена Сына Твоего, Пречистая, * утробою матернею растерзаема, жалостно зывала еси: * увы Мне, како зашел еси, Свете Мой Безлетный?

Песнь 4

Ирмос: Любве ради, Щедре, Твоего образа * на Кресте Твоем стал еси, * и растаяшася языцы: * Ты бо еси, Человеколюбче, * крепость моя и хваление.

Священнодействовав жертвы безкровныя за тя пожренному, и сам пожерлся еси, яко агнец, и Тому принеслся еси, Богомудре пребогате.

Сотрошася пред лицом твоим, святителю, нечестия горы, и холми демонов вси растаяшася, Христу укрепляющу тя.

Высочайшее житие имый, преблаженне, хотяй, вознесся еси на древо, Божественной страсти подобяся мир вознесшаго.

Богородичен: Провидя рождество Твое, Пречистая, Тя Аввакум прописует, яко присенную гору, из неяже един Бог наш прошел есть.

Песнь 5

Ирмос: Просвещение Твое, Господи, низпосли нам * и от мглы прегрешений разреши ны, Блаже, * Твой мир даруяй.

Волею, блаженне, предал еси себе весь сожещися огнем мучения, блаженне Симеоне, во благовоние тайно соблюдаемь.

Яко овча непорочное, предал еси себе пострадати усердно, подобяся Христу, нас ради плотию пострадавшему и страсти отгнавшему.

Храм Божественного Духа быв, премудре, храмы идольския низложил еси силою твоих молитв и заблужденныя к свету наставил еси.

Богородичен: О нас моли Христа, от Твоих чистых кровей, Пречистая Отроковице, в плоть вещественную облекшаяся и человеки обновльша.

Песнь 6

Ирмос: Возопи, прообразуя погребение тридневное, * пророк Иона, в ките моляся: * от тли избави мя, Иисусе, Царю сил.

Научился еси преславно от Божественного сияния, яже к Божественному ты наставляюща животу, пребогате, и неизреченнаго явился еси, святителю, исполнен разума.

Вод ты животочных исполнена духовных, якоже ину реку, из Едема исходящую, Симеоне, Божественная Церковь радуется, имущи.

Сел еси на высоце престоле, наместник быв Иакова и нравом причастник, святительство же мучением просветив, блаженне.

Богородичен: Исцели неисцельныя страсти, Богоневесто, души моя, врача Христа рождши человеком, страстьми Своими исцеливша страсти.

Кондак, глас 4.

Подобен: Явился еси днесь:

Яко звезду превелию, Церковь, имущи днесь Богоглаголиваго Симеона, * световодится, зовущи: * радуйся, мучеников честный венче.

Песнь 7

Ирмос: Авраамстии иногда в Вавилоне отроцы * пещный пламень попраша, * песнями взывающе: * отец наших Боже, благословен еси.

Тело мукам предав по Христе усердно, не изменился еси, ни ослабел, взывая, чудне: благословен Бог отец наших.

Божественною, преблаженне, любовию разжегся, мыслию огня вещественна сильнейши, вопия, был еси: благословен Бог отец наших.

Яко Владыка, отче, на Крест воздвиглся еси, изравнением страсти украшаяся, и поеши, веселяся: отец наших Боже, благословен еси.

Богородичен: Дево Богомати Отроковице, демонов струпе и Ангелов благоукрашение, человеков спасение, смиренную душу мою вражия лести избави.

Песнь 8

Ирмос: На Кресте плотию пригвожденнаго * и показавшаго нам оружие во спасение, * отроцы, превозносите Христа Бога нашего во веки.

Всю зарю Утешителю чистым твоим, Симеоне, прием сердцем, тьму демонов несветлую потребил еси, верныя просветив.

Море лютаго зловерия изсушив, струями Божественных учений твоих всяку напоил еси душу, клас веры плодоносящую.

Явился еси священник, твоею кровию, мучениче, вшед в Церковь Божественну, идеже всегда зриши тебе ради, яко непорочно агня, Пожержагося.

Богородичен: Да Тя гласы благодарственными, возвеселившую наш род, воспоем: покрый и сохрани нас, Богоневесто, от всякаго вреда.

Песнь 9

Ирмос: Рождество Твое нетленно явися: * Бог из боку Твоею пройде, * яко плотоносец явися на земли * и с человеки поживе. * Тя, Богородице, тем вси величаем.

Якоже столп огнен, преблаженне, явился еси, люди предводя новыя из египетския лести, и к земли обетования Божественнаго, мучениче, священнотаинниче всечестне, превел еси.

Симон Симеон сугубо звание имел еси, сугубо естеством суще Слово пред безбожными богословив и Кресту приближився: темже тя вси, сошедшеся, ублажаем.

День праздника память твою совершает Церковь, с Божественным тя почитаючи Иаковом, Симеоне, молебнo: егоже седалище приял еси, священне.

Богородичен: Светом мя озари Божественным, Света жилище, Дево, страстей моих тьму и сластей глубокою ноць, Богородительнице Пречистая, отгонящи.

НА ЛИТУРГИИ

Тропарь апостола, глас 1:

Христова ты сродника, Симеоне священноначальниче, * и мученика тверда священно восхваляем, * прелесть потребившаго * и веру соблюдшаго. * Темже, днесь всесвятую твою память празднующе, * грехов разрешение молитвами твоими приемлем.

Ин тропарь апостола, глас 4:

В мире радуешься, Симеоне Иерусалимский, * любезно Христу Богу, * тело душевное чисто сохранив, * претерпевый страсть телесную, долготерпеливе, крепко, * и в конец на кресте распят бысть. * Ты бо, Истинному Рачителю подобяся, * и от мира скоро отлучися, * лютыя язвы на себе понесе * и молишися о душах наших.

Кондак апостола, глас 4.

Яко звезду превелию, Церковь, имущи днесь Богоглаголиваго Симеона, * световодится, зовущи: * радуйся, мучеников честный венче.

Прокимен, глас 8: Во всю землю изыде вещание их, * и в концы вселенныя глаголы их.

Стих: Небеса поведают славу Божию:

Апостол к Коринфяном, зачало 131.

Братие, Бог ны посланники последняя яви, яко насмертники, зане позор быхом миру и Ангелом и человеком. Мы убо буи Христа ради, вы же мудри о Христе, мы немощни, вы же крепцы, вы славни, мы же безчестни. До нынешняго часа и алчем, и жаждем, и наготуем, и страждем, и скитаемся, и труждаемся, делаяще своими руками. Укоряеми, благословляем, гоними, терпим, хулими, утешаемся, якоже отреби миру быхом, всем поправление доселе. Не срамляя вас сия пишу, но якоже чада моя возлюбленная наказую. Аще бо и многи пестуны имате о Христе, но не многи отцы, о Христе бо Иисусе благовествованием аз вы родих. Молю же вас: подобни мне бывайте, якоже аз Христу.

Аллилуя, глас 1: Исповедят Небеса чудеса Твоя, Господи.

Евангелие от Матфея, зачало 56.

Во время оно, прииде Иисус во отечествие Свое, и учаше народы на сонмищи их, яко дивитися им и глаголати: откуда Сему премудрость сия и силы? Не Сей ли есть тектонов сын? Не Мати ли Его нарицается Мариам, и братия Его Иаков и Иосий, и Симон и Иуда? И сестры Его не вся ли в нас суть? Откуда убо Сему сия вся? И блажняхуса о Нем. Иисус же рече им: несть пророк без чести, токмо во отечествии своем и в дому своем. И не сотвори ту сил многих за неверство их.

Причастен: Во всю землю изыде вещание их, * и в концы вселенныя глаголы их.

СВЯТОЙ АПОСТОЛ И СВЯЩЕННОМУЧЕНИК СИМЕОН, СРОДНИК ГОСПОДЕНЬ

Святой апостол и священномученик Симеон, сродник Господень, был сыном Клеопы, младшего брата святого Иосифа Обручника. В зрелом возрасте он увидел чудеса Господа Иисуса Христа, уверовал в Него и стал одним из 70-ти апостолов.

Святой Симеон проповедовал учение Христово, наставлял в истинах святой веры и обличал идолослужение. После убиения святого апостола Иакова († 63; память 23 октября), первого епископа Иерусалимского, на его место христиане избрали святого апостола Симеона. В правление императора Траяна (98–117) римскому правителю Аттику донесли, что святой Симеон происходил из рода царя Давида (римляне уничтожали всех потомков царя Давида) и исповедует христианскую веру. Язычники схватили святого Симеона, который в то время был уже столетним старцем, и после долгих мучений распяли на кресте.